

Bil. 38

Selasa

27 November 2018



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

PARLIMEN KEEMPAT BELAS  
PENGKAL PERTAMA  
MESYUARAT KEDUA

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Kementerian Perumahan dan Kerajaan Tempatan  
Harus Mengharamkan Import Sisa Plastik yang  
Tidak Boleh Dikitar Semula**  
- *YB. Tuan Charles Anthony Santiago (Klang)* [Halaman 1]
- **Masalah Anjing Liar di Daerah Seremban**  
- *YB. Tuan Cha Kee Chin (Rasah)* [Halaman 4]

**MALAYSIA  
KAMAR KHAS  
PARLIMEN KEEMPAT BELAS  
PENGKAL PERTAMA  
MESYUARAT KEDUA**

**Selasa, 27 November 2018**

**Mesyuarat dimulakan pada pukul 2.30 petang**

**DOA**

*[Tuan Yang di-Pertua **mempengerusikan Mesyuarat**]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Kementerian Perumahan dan Kerajaan Tempatan  
Harus Mengharamkan Import Sisa Plastik yang Tidak Boleh Dikitar Semula**

**2.34 ptg.**

**Tuan Charles Anthony Santiago [Klang]:** Terima kasih Tuan Yang di-Pertua. Tuan Yang di-Pertua, ini adalah untuk memberi notis di bawah Peraturan Mesyuarat 14(1)(h) dan 17(1) untuk mengusulkan perkara kepentingan kepada orang ramai yang berkehendak disegerakan seperti berikut:

"Bahawa Dewan mengizinkan Charles Santiago, Ahli Parlimen Klang untuk menangguhkan Dewan mengikut Peraturan Mesyuarat 14(1) untuk mengusulkan perkara kepentingan kepada orang ramai yang berkehendak disegerakan dalam Kamar Khas iaitu "Kementerian Perumahan dan Kerajaan Tempatan Harus Mengharamkan Import Sisa Plastik Yang Tidak Boleh Dikitar Semula".

Sejak negara China melarang pengimportan sisa plastik dari negara Eropah dan Amerika Syarikat pada tahun 2017, negara-negara ASEAN telah menjadi destinasi utama sisa plastik negara Eropah.

Menurut statistik UK dari Januari hingga April 2018, jumlah import sisa plastik dari UK ke Malaysia adalah lebih kurang 50 juta kilogram, iaitu tiga kali ganda berbanding tahun 2017. Kadar pertambahan import sisa plastik dari UK ke Malaysia adalah paling tinggi di seluruh dunia. Berita terbaru ialah sisa plastik Australia dan New Zealand juga dihantar ke Malaysia.

Saya menerima aduan dari penduduk Klang dan Kuala Langat tentang penubuhan kilang kitar semula sisa plastik luar negara seperti, "*cendawan tumbuh selepas hujan*" di kawasan Telok Gadong, Pulau Carey, Jenjarom dan juga Banting.

Mereka mengadu bahawa kilang-kilang tersebut menghasilkan bau busuk dan menjejaskan kesihatan penduduk tempatan. Mereka mengesyaki kilang-kilang tersebut beroperasi secara haram oleh warganegara China dan membuang sisa plastik secara terus ke dalam Sungai Langat.

Saya memuji pihak berkuasa tempatan (PBT) dan kementerian-kementerian telah mengambil tindakan pantas terhadap kilang kitar semula haram di Kuala Langat. Akan tetapi saya amat keliru dengan pengumuman Menteri Perumahan dan Kerajaan Tempatan Yang Berhormat Zuraida Kamaruddin bahawa kementerian akan mengenakan levi sebanyak RM15 juta satu tan terhadap sisa plastik selepas 23 Oktober 2018.

Dengan ini, saya meminta KPKT menjawab soalan-soalan yang timbulkan dalam isu pencemaran alam sekitar ini. Sekian, terima kasih.

**2.35 ptg.**

**Timbalan Menteri Perumahan dan Kerajaan Tempatan [Dato' Raja Kamarul Bahrin Shah bin Raja Ahmad]:** Terima kasih Tuan Yang di-Pertua. *Assalamualaikum warahmatullahi wabarakatuh* dan salam sejahtera. Tuan Yang di-Pertua, untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Pengurusan Sisa Pepejal Negara (JPSPN) telah pun menetapkan dasar yang jelas mengenai pengimportan skrap plastik (*plastic scrap*) ke negara ini.

Dasar tersebut adalah penting bagi menangani peningkatan kemasukan skrap plastik dari negara luar kerana KPKT tidak akan sekali-kali menjadikan negara ini sebagai *dumpsite* bagi sisa plastik import. KPKT hanya membenarkan pengimportan skrap plastik yang bernilai tinggi, *homogeneous* dan bersih daripada sumber perindustrian yang tertakluk di bawah Perintah Duti Kastam 2012 dengan H.S. Code 3915. Sumber skrap plastik diimport hanya dari negara-negara yang dibenarkan seperti Jepun, United Kingdom, Australia dan Eropah memandangkan negara-negara tersebut telah mempunyai sistem kawalan pengurusan dan pengasingan sisa pepejal yang cekap. *We are very well regulated.*

KPKT telah mengadakan operasi bersepadu bersama pelbagai agensi kerajaan antaranya pihak berkuasa tempatan (PBT), Tenaga Nasional Berhad (TNB), Syarikat Bekalan Air Selangor Sendirian Berhad (SYABAS), Perbadanan Pengurusan Sisa Pepejal dan Pembersihan Awam (SWCorp), Polis Diraja Malaysia (PDRM) dan lain-lain bagi membasmi

dan menutup kilang haram sisa plastik di Daerah Kuala Langat, Selangor. Operasi bersepadu bagi membasmi dan menutup kilang haram sisa plastik ini juga akan diperluas ke seluruh negara dengan kerjasama pelbagai agensi kerajaan yang berkaitan.

Tindakan tegas akan diambil terhadap pengusaha kilang-kilang haram bagi memastikan mereka tidak menyambung operasi di masa akan datang yang mana akhirnya boleh mendatangkan kesan negatif kepada alam sekitar dan menjejaskan kesihatan penduduk tempatan. KPKT juga telah memutuskan syarat-syarat baharu untuk memastikan industri ini dapat dikawal selia dengan baik bagi mengelakkan lesen import (*approved permit* – AP) sisa plastik yang dikeluarkan oleh KPKT disalahgunakan seperti penjualan AP kepada pihak ketiga yang tidak berdaftar.

Untuk makluman Yang Berhormat, satu Mesyuarat Jawatankuasa Khas Peringkat Menteri yang dipengerusikan oleh Menteri Perumahan dan Kerajaan Tempatan dengan turut disertai oleh Menteri Air, Tanah dan Sumber Asli, Menteri Tenaga, Sains, Teknologi, Alam Sekitar dan Perubahan Iklim serta Menteri Perdagangan Antarabangsa dan Industri telah diadakan pada 26 Oktober 2018 bagi membincangkan tatacara dan hala tuju pengimportan skrap plastik H.S. Code 3915.

Antara perkara utama yang turut dibincangkan dalam mesyuarat tersebut adalah kesan pencemaran lambakan sisa plastik ke atas persekitaran negara, sumbangan industri sisa plastik kepada ekonomi negara dan kepentingan sosial serta keperluan menjana industri kitar semula yang bersumberkan sisa tempatan.

#### ■1440

Mesyuarat tersebut telah bersetuju dengan syarat-syarat baharu bagi kelulusan AP Sisa Plastik H.S. Code 3915 yang perlu dipatuhi oleh pengimport bagi mengawal kemasukan sisa plastik import ke Malaysia seperti berikut:

- (i) mengemukakan surat kelulusan memasang dan mengoperasi jentera daripada Jabatan Keselamatan dan Kesihatan Pekerjaan (JKKP);
- (ii) pengesahan kapasiti sebenar mesin pemprosesan oleh SIRIM atau jurutera bertauliah;
- (iii) menyatakan maklumat lokasi pelupusan sisa yang dijana dari kilang pengimport;
- (iv) mengemukakan senarai pembeli produk akhir;
- (v) mengemukakan semua senarai kilang di bawah milik syarikat;
- (vi) menetapkan *ratio* bagi syarikat pengimport sisa plastik yang mengehendkan 70 peratus sumber import;

- (vii) mengehendkan pengimportan hanya kepada skrap plastik daripada premis perindustrian/*selected segregated post-consumer waste*;
- (viii) menyekat pengimportan sisa plastik dari negara membangun;
- (ix) menetapkan lokasi yang bersesuaian (*zoning*) pada premis pemprosesan sisa kitar semula;
- (x) memperkenalkan bayaran levi kepada pengimport; dan
- (xi) memperkenalkan Jaminan Bank (*bank guarantee*) kepada pengimport.

Bagi bayaran fi skrap plastik import, pihak KPKT bercadang mengenakan bayaran sebanyak RM50/tan. Fi yang dikenakan ini bertujuan untuk memastikan aktiviti pengimportan dilaksanakan mengikut tatacara yang ditetapkan oleh KPKT dengan mengambil kira kos-kos yang perlu ditanggung oleh KPKT seperti kos pentadbiran, kos pemantauan serta kos pembersihan sekiranya berlaku pembuangan sampah haram daripada aktiviti pengimportan sisa plastik tersebut. Fi skrap plastik import ini akan dilaksanakan setelah diluluskan oleh Jabatan Peguam Negara. Sekian, terima kasih.

### **Masalah Anjing Liar di Daerah Seremban**

#### **2.43 ptg.**

**Tuan Cha Kee Chin [Rasah]:** Terima kasih Tuan Yang di-Pertua kerana memberikan peluang kepada saya. Saya ingin membangkitkan perkara yang berkaitan dengan masalah anjing liar di Daerah Seremban yang melibatkan Majlis Perbandaran Seremban (MPS) dan Majlis Perbandaran Nilai (MPN). Semua pihak bersetuju bahawa masalah anjing liar wajar diberikan perhatian dan ditangani dengan serius demi keselamatan dan keharmonian khususnya di kawasan kediaman ataupun perumahan. Penangkapan anjing liar adalah langkah yang wajar dilaksanakan secara berkala agar anjing-anjing liar tidak berkeliaran di kawasan perumahan.

Pada 6 September 2018, Majlis Perbandaran Seremban dengan kerjasama Jabatan Veterinar Negeri Sembilan telah menjalankan operasi yang dinamakan sebagai “Operasi Bersepadu Menangkap Anjing Liar” yang telah diketuai oleh Yang di-Pertua MPS sendiri.

Walau bagaimanapun, operasi yang diberikan nama “menangkap” ini bukan sahaja menangkap tetapi turut membunuh anjing dengan serta-merta dengan menggunakan cara

suntikan di depan rumah kediaman sebaik sahaja anjing-anjing itu ditangkap. Malahan, ada beberapa orang kakitangan telah menceroboh masuk ke dalam rumah kediaman untuk menangkap anjing dan telah menjejaskan kesihatan seorang wanita yang sarat mengandung.

Insiden ini telah mengundang kecaman daripada pelbagai pihak yang mempertikaikan pendekatan yang dilaksanakan oleh MPS. Ia dilihat zalim, menjejaskan kesejahteraan dan mendatangkan gangguan mental dan psikologi kepada para penduduk yang telah menyaksikan kejadian membunuh anjing-anjing tersebut. Insiden yang berlaku pada 6 September 2018 telah membuka mata pelbagai pihak dengan persoalan-persoalan berikut yang wajar diberikan perhatian:

- (a) apakah nas undang-undang yang memberikan bidang kuasa kepada pihak berkuasa tempatan (PBT) dan Jabatan Veterinar dalam menangkap dan membunuh anjing-anjing liar?;
- (b) kenapakah Jabatan Veterinar tidak melaksanakan pendekatan dengan cara mengawal pembiakan haiwan terbiar iaitu satu cara yang lebih berperikemanusiaan?;
- (c) kenapakah tiada tempat perlindungan khas untuk haiwan terbiar atau anjing liar disediakan di setiap negeri atau daerah?;
- (d) bolehkah pendekatan “pemandulan haiwan” dilakukan ke atas anjing liar dilakukan berbanding dengan pembunuhan?;
- (e) apakah tindakan yang akan diambil oleh KPKT untuk mengelakkan kejadian pada 6 September 2018 berulang di mana-mana tempat lain?; dan
- (f) apakah polisi kebangsaan KPKT tentang masalah haiwan terbiar dan anjing liar ini?

Saya mohon perhatian Yang Berhormat Menteri KPKT memberi jawapan terhadap beberapa persoalan yang diketengahkan ini. Sekian, terima kasih Tuan Yang di-Pertua.

**2.45 ptg.**

**Timbalan Menteri Perumahan dan Kerajaan Tempatan [Dato' Raja Kamarul Bahrin Shah bin Raja Ahmad]:** Terima kasih Tuan Yang di-Pertua dan terima kasih sahabat saya yang mengajukan soalan. Tuan Yang di-Pertua, untuk makluman Yang Berhormat, di bawah Seksyen 73(1)(m), Akta Kerajaan Tempatan 1976 [Akta 171] telah memperuntukkan kuasa kepada pihak berkuasa tempatan (PBT) untuk mengadakan Undang-undang Kecil

(UUK) Pelesenan Anjing untuk menyelia, melesen, menyita, memusnahkan dan melupuskan anjing liar dalam kawasan PBT. Di bawah UUK tersebut, semua anjing yang dipelihara hendaklah dilesenkan oleh PBT. Semua anjing yang tidak berlesen atau berlesen, yang merayau tanpa tuan atau penyelia di tempat awam dalam kawasan PBT adalah ditakrifkan sebagai anjing terbiar yang boleh diambil tindakan oleh PBT. PBT juga berkuasa menangkap, menyita, memusnahkan atau melupuskan anjing terbiar dalam kawasan PBT mengikut prosedur operasi standard (SOP) yang telah ditetapkan.

Di bawah seksyen 80, Akta 171 juga memperuntukkan kuasa kepada PBT untuk memberhentikan, memusnahkan dan menghapuskan segala kacau ganggu dari jenis awam dalam kawasan PBT, manakala seksyen 81(b), Akta 171 memperuntukkan kuasa kepada PBT untuk mengambil tindakan secara terus ke atas anjing-anjing terbiar atau liar yang menjadi punca kacau ganggu kepada penduduk setempat.

Tuan Yang di-Pertua, merujuk kepada soalan (b) dan (c) dan (d), untuk makluman Yang Berhormat, isu-isu mengenai persoalan kawalan pembiakan haiwan terbiar, perlindungan khas dan pemandulan haiwan liar merupakan bidang kuasa Jabatan Perkhidmatan Veterinar. Kementerian Perumahan dan Kerajaan Tempatan (KPKT) dan PBT tidak mempunyai polisi untuk menyediakan tempat perlindungan khas (*sanctuary*) untuk anjing terbiar atau anjing liar kerana KPKT melalui PBT menguruskan semua anjing terbiar berdasarkan kepada peruntukan di dalam Akta 171 dan UUK Pelesenan Anjing yang telah ditetapkan. Walau bagaimanapun, KPKT telah mengeluarkan SOP di mana PBT perlu menyediakan tempat simpanan anjing sementara untuk menempatkan anjing-anjing terbiar yang ditangkap dan untuk tindakan seterusnya.

Saya juga ingin merujuk kepada soalan (e) dan (f). Tuan Yang di-Pertua, untuk makluman Yang Berhormat, KPKT telah menyediakan SOP Penangkapan dan Pelupusan Anjing Terbiar di kawasan PBT melalui Pekeliling Ketua Setiausaha KPKT Bilangan 5 Tahun 2014 pada 9 Julai 2014 untuk diguna pakai oleh semua PBT di seluruh Malaysia dalam pengurusan anjing terbiar. SOP ini telah dibangunkan dengan penglibatan PBT, Jabatan Perkhidmatan Veterinar, NGO dan pihak-pihak berkepentingan. SOP ini telah mengambil kira unsur-unsur kebajikan haiwan di mana tatacara penangkapan, pengendalian dan pelupusan anjing terbiar dilaksanakan tanpa penganiayaan kepada haiwan.



**■1450**

SOP ini diguna pakai bersama-sama dengan UUK Pelesenan Anjing PBT dalam pengurusan anjing terbiar atau liar di kawasan PBT. Berdasarkan SOP ini:

- (i) semua anjing terbiar atau liar akan ditangkap dan dibawa ke tempat pengurungan anjing terbiar PBT;
- (ii) tuan empunya anjing boleh menuntut semula anjing mereka dalam tempoh pengurungan yang telah ditetapkan;
- (iii) permohonan tuntutan semula anjing dikehendaki menepati prosedur yang ditetapkan oleh PBT masing-masing dengan membayar kompaun dan memohon lesen sekiranya anjing tersebut belum mempunyai lesen anjing PBT; dan
- (iv) mana-mana anjing yang tidak dituntut selepas tempoh pengurungan yang ditetapkan akan dilupuskan mengikut SOP ini.

Oleh itu, polisi kerajaan mengenai masalah anjing terbiar atau liar adalah selaras dengan peruntukan-peruntukan di bawah Akta 171 dan UUK Pelesenan Anjing PBT. Sekian, terima kasih.

**Tuan Yang di-Pertua:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 28 November 2018.

***[Kamar Khas ditangguhkan pada pukul 2.52 petang]***